

MONITION/INTSWEM

Lectures : *Ac 2, 1-11 ; 1Co 12, 3-13 ; Jn 20, 19-23.*

Na lumingu yai ya iya, kwa beto ke fula na kuta nkinsi Pake, mono ikele na kiese mingi na kukuma awa na Paroisse yai ya Intswem, ye mpi na kudiatisa na kati na beno kimenga yai ya misa. Na lumingu yai ya iya, ya Yezu Kristu, Ngungudi ya mbote, beto ata samba sambu na balubokilu na kati ya dibundu na beto. Kaka bubu yai mpi na kati ya kimenga yai ya misa, bampangi na beto yankaka ta tambula ngolo ya Mpeve Santu na kisakramento ya Nsiamisa. Bo ata kituka bantumwa ya Mfumu Yezu sambu na kufula kisalu ya Yandi yantikaka, kisalu ya kulonga bantu Nsangu ya Mbote sambu na lugulusu na bo, **Nsangu ya mvukana, Nsangu ya nkenda, nsangu ya ndodula, Nsangu ya ngemba, Nsangu ya kiese.**

Beto ata vukisa bisambu na beto na kulomba ngolo ya Mpeve-Santu. Mfumu Nzambi kusiamisa beto yonso na dienga na Yandi, na mpila nde bampangi yai ya ata tambula ngolo ya Mpeve Santu, ye beto yonso mpi, kukituka **basoldat ya kieleka** ya Mfumu Yezu sambu na kulonga ndinga na Yandi ntangu yonso ye na ndambu yonso.

Beto ata samba mpi sambu na Dibundu na beto ya Idiofa, na mvula yai ya beto yonso ke fula lutungu na yo, na mpila nde, beto yonso kuvanda na kimvuka, nkatu kutala bandinga, babwala, ye makanda na beto ; nde na kimvuka, beto yonso kutelama, beto kutunga diocèse na beto.

Beto yilama na kutambula makabu yai yonso ya beto ke lombana na Mfumu Nzambi.

Kansi beto kulomba ntete ndolula ya masumu na beto na ntwala beto kutambika kimenga yai ya santu ya misa.

HOMELIE / INTSWEM

Bampangi batondama,

Malongi na mono ata vanda na ndambu tatu : ntete mono ata longa beno na yina me tadila nsiamisa ; na ndambu ya zole mono ata tubila beno sambu na mambu ya nzo-nkanda ; ye mono ata sukisa na kumbambula beno mbundu na mpila ya beto yonso fwete fula na kutunga diocèse na beto.

Bubu ikele kilumbu ya nene ye ya kiese na Paroisse na beto. Sambu na kilumbu yai, bampangi na beto mingi ata tambula kisakramento ya nsiamisa. Mfumu Nzambi ta kabila bo Mpeve na Yandi ya ke pesa na bo ngolo ti malungalala ya kieleka, ya ke pusa bo na kwenda kuzabisa Nsangu ya lugulusu ya Kristu na bisika yonso ya bo ke zinga.

Ya kieleka, tuka mbotika na beto, beto kutambulaka Mpeve Santu. Mpamba ve, na kisakramento ya **mbotika ya ke pesamaka kaka mbala mosi na luzingu ya mvimba**, beto me kotaka na kikanda ya bana ya Nzambi.

Beto me kuma mutindu yina bantu ya Nzambi ke zolaka. Ye mafuta ya santu ya beto kutambulaka kutulaka na beto kidimbu ya Mpeve Santu ya nkatu muntu kulenda kukatula na ntoto yai.

Nsiamisa ke kwisa kuyika ye kulungisa dienga ya mbotika ya beto kutambulaka. Ye bonso mbotika, **Nsiamisa ke pesamaka kaka mbala mosi**. Muntu ya ke tambula nsiamisa ke tambula mpi kidimbu ya Mpeve Santu. Yandi ke kituka mutindu yina tempelo ya Mpeve Santu.

Bampangi batondama,

Kulomba ye kutambula kisakramento yai ikele kidimbu ya kikesa. Muntu ya ke tambula yo ke yela na nzila ya lukwikilu, ya kivuvu ye ya lutondo. Yandi fwete kwamina ntangu yonso na nzila ya mambote.

Mabundu ya kisakramento yai ya nsiamisa ya Mpeve ke kotisa na kati ya muntu na ntangu ya yandi ke kusiamisa yandi bonso na Pentekote ikele kuyedisa ti kulungisa badienga ya mbotika; disongidila nde: Yandi ke yedisa makabu nsambwadi ya Yandi mosi ke tula na ntima ya konso mukristu : Mpeve ya Nzambi, malungalala, mayele, ndongisila, ngolo, kuzaba ti boma ya Nzambi.

Ntalu yai nsambwadi ke songidila nde Mpeve Santu ke pesa na muntu makabu yonso ya yandi ikele na yo mfunu. Disongidila mpi nde muntu ya ke tambula makabu yai ya Mpeve Santu, yandi lenda kulutisa diaka ntangu ve na kusosa makabu to badienga ya nkaka. Na Dibundu ya Santu ya Katolika, beto ke baka na kimpeve mambote yonso ya luzingu na beto.

Yo yina bampangi, konso muntu kutula ngolo ye kukwamina na kusadila ntangu yonso makabu ya yandi ta tambula. Beno kwelisa bikalulu na beno na makabu yai ya Mpeve ta tula na beno. Ya beno ke tambula Mpeve Santu, beno ke yantika luzingu ya mpa.

Beno bampangi ya ta tambula kisakramento yai ya nsiamisa ti beno ya me tambulaka yo, malongi yai ya beno me wa kusadisa beno na kuvanda basoldat ya kieleka ya Kristu ya ke kulonga ti kikesa yonso Nsangu na Yandi ya lugulusu na bisika yonso ya beno ke kuzinga.

Sesepi yai mono ke tubila beno na yina me tadila nzo-nkanda.

Je parle de l'enseignement parce qu'il est l'une des roues de l'évangélisation ; pour nous les catholiques, l'évangélisation est comme une voiture à quatre roues. Ce n'est pas non plus pour moi, une manière de vous moraliser. J'en parle puisque l'avenir de nos enfants, l'avenir de notre pays et de notre église en dépend.

Bampangi, mono ke zola diaka ve kuwa mambu yai ya balaboratoires na ntangu ya ba examens d'Etat go na dissertation. Beno keba na kulombaka to kupesaka mbongo ya l'Etat me lomba ve; ntete-ntete yina ya beno ke bingaka nde "Organisation matérielle" go mbongo ya nkaka ya muyibi. Mambu yai ya beto ke sala, beto ke bebisa luzingu ya bana na beto ; bo ata kwenda na ntwala ve ye luzingu na bo mpi ata toma ve ! Beto kuyambula na kusumba ba maplômes ya ata sadisa bana na beto ve ye avenir na bo mpi ve. J'en appelle à la vigilance de tous et à l'attention particulière des gestionnaires catholiques, des curés des paroisses et de la société civile. Veillons, veillons pour bouter hors de notre réseau ce grand malaise qui tend à biaiser toute notre action éducative.

Sesepi yai, mono ke tubila beno na yina me tadila lutungu ya diocèse na beto.

Bampangi batondama,

Mpeve Santu ikele kupesa dienga na kuzaba Yezu Kristu bonso Ngulusi ye Mfumu ye ya kulungisa bumosi na kati na beto bantu. Ba luswaswanu na beto ikele kukituka dienga ya Mfumu Nzambi; kubuya kutambula dienga yina sambu na bandinga na beto, makanda na beto, mabwala na beto, ikele kubuya na kulatama na Kristu ye kukonda kulemfukila Mpeve ya Nzambi.

Bampangi batondama,

Kwa beto imene kuyantika mvula yai ya Tat'eto François me kangula na le 8 Décembre nde mvula ya **“NKENDA”** (Miséricorde) na Dibundu na beto ya mvimba, beto kuzingila Nkenda yina sambu nde ntoto na beto kusoba ye kubaka luse ya mpa. Kana beto ikele kuzingila nkenda ye ndolula, beto ata vanda bantu ya ikele sadisa ye sadila bankaka na nzila ya lutondo.

Ntu dilongi ya Dibundu na beto ya mvimba ikele kukwendila kumosi ti ntu dibansa ya mvula yai ya bisambu na Diocèse na beto : **“KUKANGAMA NA KIMPANGI YA LUTONDO YE YONSO KAKA NA LUTONDO”** (Etre solidaires dans l’amour et tout par amour). Beto yonso kuvanda muntu mosi sambu na kufula na kutunga ye kiese diocèse na beto na bisalu ya nkenda : ntima ya mawa, lutondo, kukaba, ndolula, bumosi, kimpangi, mbatalala-mbundu, kusosa ngemba ye masonga, makieleka. Kana beto zingila mabundu yai ya nkenda, nkenda ya ikele Nzambi Yandi mosi kibeni, Ya imene kukisonga na Luse ya Mwana na Yandi Umosi Yezu Kristu, Mafamilia, Nsi ye ntoto na beto ata bonga ye konso muntu ata zinga luzingu ya kieleka.

Beto vukana, beto vukisa bangindu ye mayele na beto na mpila nde beto kukwenda na ntwala.

Déjà Diocèse na beto ikele na kukwenda na ntwala. Mfunu ya kuvutuka diaka na nima ikele ve.

Bampangi batondama,

Beto imene kuwa na ndinga ya Santu nde, makabu yai yonso, ikele ti kisina kaka mosi ye Mfumu Nzambi kibeni ke kabilaka bantu, na nsadisa ya dienga na Yandi ye luzolo na Yandi kibeni. Makabu ya beto imene kuzwa, ikele sambu na kutunga beto yonso, Dibundu ya Kristu.

Beto samba mpi sambu na mafamilia yonso ya ntoto mvimba; na mpila nde yo vanda kindimbu ya nkenda ye ya ndolula. Familia ikele kisina na beto yonso. Yo yina beto tambika kumosi ti mafamilia balubokilu na beto yonso na Mfumu Nzambi.

Mono ke zodila beno yonso nkinsi Pake ya mbote ye mono ke yambula mafamilia na beno na Nkenda ya Mfumu Nzambi, na nsadisa ya bisambu ya Mama Maria, Mwense kaka, nde na bisambu na Yandi, Mfumu Nzambi kupesa beto dienga ya kuzingila kiese ya Nsangu ya Mbote.

Na beno yonso ngemba ya Kristu.

Intswem, le 17 avril 2016

+ José MOKO EKANGA

Pisekopo ya Idiofa